



Slijeđenje Poslanika, sallallahu alejhi ve sellem (Medina)

Hatib: dr. Abdullah ibn Abdurrahman el-Buajdžan

15. rebiul-evvel 1443. po Hidžri / 22. oktobar 2021.

Hvala Allahu, Gospodaru svih svjetova, Koji nam je vjeru usavršio i blagodat prema nama upotpunio, i Koji je zadovoljan da nam islam bude vjera.

Svjedočim da nema boga osim Allaha, jedinog, Koji druga nema, a onaj ko Allahu druga pripiše, daleko je zalutao. Svjedočim da je Muhammed, sallallahu alejhi ve sellem, Njegov rob i poslanik, neka su na njega Allahova milost, blagoslov i mir, i na njegovu porodicu i ashabe. Najbolji govor je Allahov govor, a najbolja uputa je uputa Allahovog Poslanika, sallallahu alejhi ve sellem. Najgore stvari u vjeri su novotarije, svaka novotarija je zabluda, a svaka zabluda vodi u Vatru.

Poštovani vjernici, oporučujem sebi i vama bogobožnost, ona je Allahova oporuka prvima i potonjima. “Mi smo onima kojima je data Knjiga prije vas, a i vama, već zapovjedili da se bojite Allaha.” (En-Nisa, 131) O vjernici, Allah je razumom odlikovao čovjeka nad drugim bićima, i time ga zadužio propisima i obavezama. Čovjeku, kao razumnom biću, propisao je zakone i norme, dozvolio halal, a zabranio haram, za onoga ko Mu se bude pokoravao pripremio je Džennet, Kuću nagrade i uživanja, a za onoga ko Mu se bude suprotstavio pripremio je Vatru, Kuću kazne i teške patnje, uspostavio je dokaz protiv čovjeka slanjem vjerovjesnika i poslanika, koje je poslao ljudima sa radosnim vijestima i opomenom, “da ljudi poslije poslanika ne bi nikakva opravdanja pred Allahom imali” (En-Nisa, 165). Poslao ih je sa jasnim dokazima i uputom, i po njima knjige i terazije objavljivao da bi ljudi pravedno postupali. Uzvišeni kaže: “Mi smo izaslanike Naše s jasnim dokazima slali i po njima knjige i terazije objavljivali, da bi ljudi pravedno postupali.” (El-Hadid, 25) Zapečatio je vjerozakone islamskim vjerozakonom – šerijatom, a vjerovjesništvo našim vjerovjesnikom Muhammedom, sallallahu alejhi ve sellem, najboljim stvorenjem,





kojeg je poslao kao uzor i milost svim svjetovima, posljednjeg poslanika i predvodnika svih vjerovjesnika i poslanika, svjedokom, onoga koji je došao sa radosnom viješću i opomenom, koji je pozivao Allahu, Njegovom dozvolom, i svjetiljkom koja sija. Uzvišeni kaže: "Došao vam je Poslanik, jedan od vas, teško mu je što ćete na muke udariti, jedva čeka da Pravim putem pođete, a prema vjernicima je blag i milostiv." (Et-Tevba, 128)

O ljudi, Allah, džellešahu, uspostavio je vezu između pokornosti Njegovom vjerovjesniku i pokornosti Njemu, i između ljubavi prema Njemu i slijedenja Vjerovjesnikove upute i sunneta.

Uzvišeni kaže: "O vjernici, pokoravajte se Allahu i pokoravajte se Poslaniku, i ne ništite djela svoja!" (Muhammed, 33)

"Onaj ko se pokorava Poslaniku pokorava se i Allahu; a onaj ko glavu okreće – pa, Mi te nismo poslali da im čuvar budeš." (En-Nisa, 80)

"Reci: 'Ako Allaha volite, mene slijedite, i vas će Allah voljeti i grijehе vam oprostiti! A Allah prašta i samilostan je.'" (Ali Imran, 31)

Dokaz ljubavi prema Allahu je slijedenje sunneta Allahovog Poslanika, sallallahu alejhi ve sellem, i čvrsto pridržavanje njegove upute, jer on je uzor i primjer.

Uzvišeni kaže: "Vi u Allahovom Poslaniku imate divan uzor za onoga koji se nada Allahovoj milosti i nagradi na onome svijetu, i koji često Allaha spominje." (El-Ahzab, 21)

"Ono što vam Poslanik kao nagradu da, to uzmite, a ono što vam zabrani, to ostavite; i bojte se Allaha jer Allah, zaista, strahovito kažnjava." (El-Hašr, 7)

Svaki čovjek koji slijedi Vjerovjesnika, sallallahu alejhi ve sellem, kreće se pravim putem.

Uzvišeni kaže: "Na takav način Mi i tebi objavljujemo ono što ti se objavljuje. Ti nisi znao šta je Knjiga niti si poznao vjerske propise, ali smo je Mi učinili svjetlom pomoću kojeg upućujemo one robove Naše koje želimo. A ti, zaista, upućuješ na





Pravi put, na Put Allahov, kome pripada sve što je na nebesima i sve što je na Zemlji. I, eto, Allahu će se sve vratiti!” (Eš-Šura, 52–53)

“Ja-sin. Tako Mi Kur’ana mudrog, ti si, uistinu, poslanik, na Pravome putu.” (Jasin, 1–4)

O vjernici, slijeđenje i prihvatanje Vjerovjesnikovog sunneta, sallallahu alejhi ve sellem, jedna je od nužnih posljedica islama i predanosti Allahu, temelj islamskog vjerovanja i uvjet da Allah prihvati čovjekova djela.

Uzvišeni kaže: “Ko žudi da od Gospodara svoga bude lijepo primljen, neka čini dobra djela i neka, klanjajući se Gospodaru svome, Njemu nikoga ne pridružuje!” (El-Kehf, 110)

“I tako Mi Gospodara tvoga, oni neće biti vjernici dok za sudiju u sporovima međusobnim tebe ne prihvate i da onda zbog presude tvoje u dušama svojim nimalo tegobe ne osjete i dok se sasvim ne pokore.” (En-Nisa, 65)

“Kada Allah i Poslanik Njegov nešto odrede, onda ni vjernik ni vjernica nemaju pravo po svome nahođenju postupiti. A ko Allaha i Njegova Poslanika ne posluša, taj je sigurno skrenuo s Pravoga puta.” (El-Ahzab, 36)

“A Mi smo poslali svakog poslanika zato da bi mu se, prema Allahovom naređenju, pokoravali.” (En-Nisa, 64)

Allah će učiniti prezrenim i poniženim onoga ko se suprotstavi Poslanikovim naredbama i sunnetu. Ibn Omer, radijallahu anhumu, prenosi da je Allahov Poslanik, sallallahu alejhi ve sellem, rekao: “Onaj ko mi se suprotstavi bit će ponižen i prezren.” (Ahmed)

O ljudi, uputa i spas su u pokoravanju Vjerovjesniku, sallallahu alejhi ve sellem, i čvrstom držanju njegovog sunneta. Uzvišeni kaže: “Reci: ‘Pokoravajte se Allahu i pokoravajte se Poslaniku!’ A ako ne htjednete, on je dužan raditi ono što se njemu naređuje, a vi ste dužni raditi ono što se vama naređuje, pa ako mu budete poslušni, bit ćete na Pravom putu; a Poslanik je jedino dužan da jasno obznani.” (En-Nur, 54)

Allah, džellešanuhu, otklonio je kaznu i iskušenja od mnogobožaca iako su oni





Njegovi neprijatelji, samo zato što je Allahov Poslanik boravio među njima. Uzvišeni kaže: “Allah ih nije kaznio jer si ti među njima bio; i Allah ih neće kazniti sve dok neki od njih mole da im se oprost.” (El-Enfal, 33) Tako će Allah otkloniti kaznu i iskušenja od ummeta i onih koje On voli ako budu slijedili Poslanikovu uputu i sunnet, molimo Allaha da nas učini od njih. Allah, džellešānuhu, upozoro je na pogubnost i opasnost suprotstavljanja Vjerovjesnikovim naredbama, sallallahu alejhi ve sellem, i pojasnio je da je to uzrok smutnje i kazne. Uzvišeni kaže: “Neka se pripaze oni koji postupaju suprotno naređenju Njegovu, da ih iskušenje kakvo ne stigne ili da ih patnja bolna ne snađe.” (En-Nur, 63)

O vjernici, Allah je sve Svoje robove stvorio u čistoj vjeri, a onda su im došli šejtani i udaljili ih od njihove vjere, zabranili im ono što je On dozvolio, i naredili im da Allahu pripišu ono o čemu nikakvog dokaza nisu imali. Allah je pogledao stanovnike Zemlje, pa ih je prezreo, Arape i nearape, osim malog broja sljedbenika Knjige, i poslao im je najboljeg poslanika, sa najboljim vjerozakonom, i po njemu je poslao najbolju Knjigu, i uputio njome onoga kome je želio sreću i počast, i propisao je nesreću i poniženje onome ko odbije njegov put i sunnet. Ebu Hurejra, radijallahu anhu, prenosi da je Allahov Poslanik, sallallahu alejhi ve sellem, rekao: “Tako mi Onoga u Čijoj je ruci Muhammedova duša, niko iz ovog ummeta, niti ijedan jevrej i kršćanin, neće za mene čuti a zatim umrijeti, ne vjerujući u ono s čime sam poslan, a da neće biti stanovnik Vatre.” (Muslim)

O vjernici, svako dobro je u slijeđenju sunneta, on je dovoljan vjerozakon, ispravan put i obilno znanje. Allah je usavršio vjeru i upotpunio Svoju blagodat prema nama, a naš Vjerovjesnik je dostavio poslanicu, ispunio preuzetu obavezu, i nije izostavio nijedno dobro a da nam nije ukazao na njega niti zlo a da nas nije upozorio na njega. Kaže Uzvišeni kaže: “„Sada sam vam vjeru vašu usavršio i blagodat Svoju prema vama upotpunio i zadovoljan sam da vam islam bude vjera.” (El-Maida, 3)

O muslimani, čvrsto prihvatite Knjigu i držite se upute i sunneta vašeg Vjerovjesnika, uhvatite se za nju “svojim zubima”, oživite sunnet u svojim životima, ustrajte u





njemu i strpite se. "I ne gubite hrabrost i ne žalostite se; vi ćete pobijediti ako budete pravi vjernici." (Alu Imran, 139)

Ebu Saleba el-Hušeni, radijallahu anhu, prenosi da je Allahov Poslanik, sallallahu alejhi ve sellem, rekao: "Pred vama su dani strpljenja, u kojima će držanje za vjeru biti poput držanja žeravice na dlanu, i u kojim će onaj koji radi dobro djelo imati nagradu pedeset ljudi od vas." Abdullah ibn Mubarek rekao je: "Neki su u ovoj predaji dodali: 'Rečeno je: 'Allahov Poslaniče, pedeset ljudi od nas ili njih?' 'Pedeset ljudi od vas', reče on.'" (Ebu Davud i Tirmizi)

Ibn Omer, radijallahu anhuma, prenosi da je Vjerovjesnik, sallallahu alejhi ve sellem, rekao: "Islam je počeo sa pojedincima, i završit će sa pojedincima, kao što je i počeo, pa blago tim pojedincima." (Muslim) U jednoj od verzija navodi se da je neko rekao: "A ko su ti pojedinci, Allahov Poslaniče?", a on je rekao: "To su oni koji čine dobro kada se ljudi pokvare. Tako mi Onoga u Čijoj je ruci moja duša, iman će se skloniti u prostoru između mekanskog i medinskog mesdžida, kao što se zmija skloni u svoju rupu." O vjernici, Allahov Poslanik, sallallahu alejhi ve sellem, upozorio nas je na opasnost novotarija, pa je rekao: "Ko u ovu našu vjeru uvede ono što nije od nje, to se odbacuje." (Muttefekun alejhi)

Irbad ibn Sarija, radijallahu anhu, rekao je: "Poslanik, sallallahu alejhi ve sellem, obratio nam se jedno jutro poslije sabaha, dirljivim obraćanjem, od kojeg su zasuzile oči i zatreperila srca, pa je neko kazao: 'Kao da je ovo je oprostajni govor, pa šta nam preporučuješ Allahov Poslaniče?' On reče: 'Preporučujem vam takvaluk (bogobojaznost), poslušnost i pokornost, pa makar abesinskom robu. Uistinu, ko poživi od vas nakon mene vidjet će mnogobrojna razilaženja. Čuvajte se novotarija, jer su one zabluda! Ko od vas to doživi, neka se čvrsto drži moga sunneta i sunneta pravednih upućenih halifa! Držite ga se čvrsto, kutnjacima! I čuvajte se novih stvari, svaka nova stvar je novotarija, a svaka novotarija je zabluda.'" (Ebu Davud i Tirmizi)

O vjernici, novotarija je zabluda koja daje krivu sliku o vjeri, razdor koji razjedinjuje muslimane i očito zlo i nepravda. Pokorite se Allahovoj naredbi i slijedite sunnet Allahovog poslanika. Uzvišeni kaže: "Pa ako ti se ne odazovu, onda znaj da se oni





“KOLIKO GOD ZNAČAJNA ULOGA HATIBA BILA ZA USPJEH NJEGOVE HUTBE,
NIŠTA MANJE NE ZAOSTAJE NI ODABIR TEME, ODNOSNO MATERIJE
KOJU TOKOM HUTBE ELABORIRA.” (PREPOROD)

HUTBE 

povode jedino za strastima svojim. A zar je iko gore zalutao od onoga koji slijedi strast svoju, a ne Allahovu uputu? Allah, doista, neće ukazati na Pravi put narodu koji sam sebi nepravdu čini.” (El-Kasas, 50)

Donosite salavate na Poslanika, sallallahu alejhi ve sellem, podarenu milost i nepresušnu blagodat, to vam je naredba od vašeg Gospodara, Koji je objavio: “Allah i meleki Njegovi blagosiljaju Vjerovjesnika. O vjernici, blagosiljajte ga i vi i šaljte mu pozdrav!” (El-Ahzab, 56)

Allah podario blagoslov meni i vama u časnom Kur'anu, i okoristio mene i vas njegovim ajetima i mudrom opomenom. Rekoh ovo i od Allaha Uzvišenog tražim oprost za sebe, vas i sve muslimane od svakog grijeha, a tražite i vi, On mnogo prašta i milostiv je.

